

ŽIVOT S POPLAVAMA

Intervju sa službenikom Civilne zaštite vezano za poplave na području grada Bihaća u 2016. godini

Civilna zaštita predstavlja organizovani odgovor države na različite vrste opasnosti koje ugrožavaju ljude, životinje, imovinu, kulturna dobra, životnu sredinu itd. Ona se organizuje, sprovodi i priprema u mirnodopskim i ratnim uslovim. Civilna zaštita obuhvata planiranje (organizovanje) i sprovođenje mjera i aktivnosti, njihov nadzor i finansiranje, obučavanje i osposobljavanje ljudstva, međunarodnu saradnju itd. Mere i aktivnosti civilne zaštite imaju za cilj zaštitu i spašavanje od elementarnih nepogoda geološkog i meteorološkog karaktera (zemljotresi, odroni, klizišta, jaki vjetrovi, grad, magla, suša, mećava), tehničko-tehnoloških katastrofa, posljedica terorističkih napada, ratnih i drugih velikih nesreća. Zbog ovakve važnosti CZ-e, i u spomen na nedavne poplave koje su zadesile naš grad i njegovu okolinu, obavili smo razgovor sa dužnosnikom CZ-e, gospodinom Senadom Hodžićem.

BAKLAVE: Koliko je bilo poplava na području grada Bihaća u 2016. godini?

Gospodin Hodžić: Na području grada Bihaća u 2016. godini je registrovana jedna poplava većeg intenziteta i nekoliko manjih koje nisu napravile ogromne štete, a nastala je u periodu od 16.02 do 19.02.2016. godine.

BAKLAVE: Smatrate li da je razlog poplavama antropogeni ili prirodni ?

Gospodin Hodžić: Smatram da je razlog i antropogeni i prirodni. Dakako veći utjecaj je sigurno antropogeni. Zbog ljudskog nemara.

BAKLAVE: Da li mislite da je eksploatacija šljunka vezana sa nastankom poplava na području grada?

Gospodin Hodžić: Eksploatacija šljunka samo djelimično ima povezanost sa poplavama. Na nekim dijelovima eksploatacija šljunka dovodi do plavljenja područja, sa druge strane na užim dijelovima ušća, eksploatacija proširuje ušće i pravi se bolja prohodnost vode.

BAKLAVE: Da li je posljednja poplava napravila štete na području grada Bihaća? Prema vašem saznanju kolike su materijalne i druge štete prouzrokovane poplavama?

Gospodin Hodžić: Posljednja poplava napravila je veće štete na području grada Bihaća. Štete su prvenstveno nastale na stambenim, pomoćnim i turističkim objektima, kao i na poljoprivrednim. Štete se trenutno sumiraju i biti će poznate tek nakon izvršene procjene od strane Komisije za procjenu šteta od prirodnih i drugih nesreća na području našeg grada.

BAKLAVE: Ko sanira štete nastale poplavama?

Gospodin Hodžić: Štete prouzročene poplavama na imovini ovdašnjeg stanovništva saniraju vlasnici ili korisnici te imovine i lokalna zajednica u skladu sa svojim mogućnostima. Ukoliko se radi o poplavi koja je proglašena kao prirodna nesreća, u finansiranju štete pored grada Bihaća, učestvuje i Vlada USK-a i Federacije Bosne i Hercegovine...

BAKLAVE: Kako se i koliko vladajuća struktura, prema vašem mišljenju, hvata u koštac sa ovom problematikom?

Gospodin Hodžić: Grad Bihać u skladu svoje nadležnosti i prema svojim mogućnostima učestvuje u rješavanju problematike vezane za poplavljena područja. U fazi preventive, permanentno vrši čišćenje kanala na svom području prema Programu rada i Budžetu za tekuću godinu. U fazi djelovanja prirodne nesreće, učestvuje na sprečavanju ili umanjenju nastalih šteta, a u fazi sanacije, to jest po završetku prirodne i druge nesreće, grad Bihać učestvuje u sanaciji šteta zajedno sa vlasnicima ili korisnicima imovine i drugim subjektima zaštite i spašavanja.

BAKLAVE: Kako vidite budućnost u ovoj okolini, da li je možda rješenje napustiti ovo područje?

Gospodin Hodžić: Naravno da nije rješenje napuštati ovo područje zbog poplava, jer se iste ne dešavaju često i ne predstavljaju neku veću opasnost.

BAKLAVE: Vidite li vi neko rješenje, odnosno kako biste vi rješavali ovaj problem?

Gospodin Hodžić: Po mom mišljenju najbolje rješenje je da svi subjekti zaštite i spašavanja na svim nivoima vlasti više ulažu u preventivu, odnosno na regulaciji rijeka, potoka i kanala, radi smanjenja i eliminisanja vode na poplavljenim područjima. Izgradnju svih vrsta objekata vršiti prema prostornoj i planskoj dokumentaciji.

BAKLAVE: Šta biste mogli dodati za kraj?

Gospodin Hodžić: Svi vlasnici, suvlasnici i korisnici imovine u obavezi su da kroz samozaštitu, kao i svi subjekti zaštite i spašavanja kao što su firme i slično, te vlasti na svim nivoima, više se angažirati i ulagati u fazi preventive kako bi smanjili ili eventualno eliminisali uzroke nastajanja poplava kako na području grada Bihaća, tako i na području drugih općina, kantona, Federacije i države Bosne i Hercegovine.

BAKLAVE: Gospodine Hodžiću, hvala Vam na izdvojenom vremenu za ovaj zanimljivi intervju. Nadamo se da ćete i u budućnosti biti tako spremni za zaštitu od vremenskih nepogoda.

Gospodin Hodžić: Hvala vama.